

أبو ايوب الانصاري

الحمد لله اشهد ان لا اله الا الله وحده لا شريك له واشهد ان محمدا عبده ورسوله
صلى الله عليه وسلم اما بعد.

اهلا ومرحبا بكم في لقاء جديد من لقاءات قصص الصحابة الكرام رضي الله عنهم
وارضاهم.

كل مره بنحاول ناخذ قصه صحابي من الاكابر والكرام يعني بنحاول ناخذ قصه
تخلص مره واحده ويكون من الصحابه الكرام اللي لهم قصه عظيمه لكن يمكن في
ثنايا السيريه مش بياخذ حقه قوي فبنحتاج نسلط الاضواء على بعض الاسماء عشان
نعرف ان احنا لينا تاريخ رهيب ولينا قدوات هائله ونعرف ان احنا يعني ننسى بقى
القدوات الهزيله اللي احنا بنشوفها في واقعنا ونربي بقى أولادنا وبناتنا على اسماء
فخمه بناتنا سمعوا سير امهات المؤمنين وشبابنا وبناتنا المفروض يسمعوا دلوقتي
قصص الصحابة الكرام وان شاء الله برده هيكون معانا في قصص الصحابة ممكن
ناخذ قصه صحابييه وارد فان شاء الله تعالى يبقى في فرصه ثانيه فرصه لقصص
صحابيات الكرام معانا في نفس السلسله.

النهارده زي ما انتم شايفين العنوان هنتكلم عن قصه الصحابي الجليل ابي ايوب
الانصاري ف النهارده احنا معانا قصه انصاري ودي لوحديها كفايه قوي ان هي
تملى الدرس بهجه وحب فان النبي عليه الصلاه والسلام قال علامه الايمان حب
الانصار وعلامه النفاق بغض الانصار خدنا الكلام ده في اول درس خالص فاكربين
فضائل الصحابه لما قلنا فضل المهاجرين والانصار والكلام ده حب الانصار هو من
الايمان لفضلهم وشرفهم ولنصرتهم للنبي عليه الصلاه والسلام بغض الانصار من
علامات النفاق والنبي عليه الصلاه والسلام بيقول لولا الهجرة لكنت امرءا من
الانصار لكنت امرءا من الانصار لو سلك الناس فجا وسلك الانصار فجا لسلكت فج
الانصار اللهم ارحم الانصار وابناء الانصار وابناء الانصار كان بيدعي لهم
كثير قوي عليه الصلاه والسلام فلما تسمع كلمه انصاري لا انت ايه تتعدل كده وتستعد
بقلبك

عشان لازم تحب الشخص دوت احبوا الانصار فاحنا النهارده معانا واحد مش هنجبه ده احنا على اخر الدرس هنقول احنا انت كنت فين ده احنا ده حب ايه اللي احنا هنجبه لابي ايوب دوت فايه استعدوا لقصه كلها حب ابو ايوب الانصاري لان ابو ايوب الانصاري كان بيحب النبي قوي والنبي كان بيحبه قوي فانت طب انا هاسألكم سؤال دلوقتي انا اتحدى ان اي حد بيسمع الاسم ده ابو ايوب الانصاري بيحس ان هو بيحبه كده لوحده صح ولا مش صح رغم ان انت ممكن مش فاكرك قصته قوي بس مش عارف ليه الاسم ده كده لما انا لما بيعدي كده على وداني بحس ب ابو ايوب الانصاري فبتحبه كده لوحده هو ربنا جعل ليه قبول عجيب وانا هقول لكم النهارده ليه القبول العجيب ده لابي ايوب الانصاري لان هو ليه مواقف الصراحه رائعه مع النبي عليه الصلاه والسلام فليه نصيب كبير جدا جدا من القبول في قلب كل من يسمعه حتى وانت مش عارف قصته قوي بس انت مجرد تسمع ابو ايوب الانصاري الله! تحس كده ان انت انا بحبه انا بحبه الله في الله.

طيب تعالوا بقى نقولوا مين ابو ايوب الانصاري يا جماعة وايه المنقبه الرهييه اللي حصلت لابي ايوب الانصاري ابو ايوب الانصاري شاب من شباب المدينة عنده حاجه وعشرين سنه... في يعني هو يوم ما النبي هاجر عليه الصلاه والسلام كان ابو ايوب الانصاري عنده 27 سنه فلو قلنا النبي عليه الصلاه والسلام قعد 13 سنه في مكه يبقى ابو ايوب الانصاري وقت البعته لما بعث النبي عليه الصلاه والسلام كان عنده كام سنه؟ 14 سنه.

قعد في المدينه زي الناس عادي ما يعرفش حاجه عن الدعوه لغايه ما حصل بقى الموقف الرائع وهو ان شباب من الانصار قابلوا النبي عليه الصلاه والسلام في سنه 11 من الهجره في موسم الحج فاكبرين النبي عليه الصلاه والسلام بعد موت ابي طالب وبعد موت خديجه كان عليه الصلاه والسلام بيدور على حد ينصره عشان يبلغ دين ربنا سبحانه وتعالى فكان بيستغل موسم الحج عشان ده اللي بيعرف يتكلم فيه مع الناس بدون ضغط من قريش فكان بيلف على القبائل يطلب النصره ما كانش بيلاقي يعني قبول منهم قوي لغايه ما لقي ست شباب من الانصار فاكبرين انت القصه دي خدناها في السيره قاعدين فعرض نفسه عليهم ودعاهم الى الله عرفوه قالوا هو ده الله هو ده ايه؟ قال لك ده مش اليهود كل شويه يكلمونا في المدينه عن نبي اخر الزمان وهم فاكبرين انه هيطلع منهم وكل شويه يحولنا عليه ووصفه وشكله ما هو ده هو ده الذي تحدثكم عنه اليهود يا معشر الانصار لا تسبقنكم اليهود اليه فعجبهم الرساله وسبحان الله يعني وقع في قلوبهم التعرف على النبي عليه الصلاه والسلام والشباب دول اسلموا راحوا المدينه رجعوا ثاني سنه 12 من البعته وحصلت بيعه العقبه الاولى وكانت بيعه على السمع والطاعه والعباده والكلام دوت والصلاه وكانت يعني اللي هو بيسموها بايعه النساء اللي هي ما فيهاش جهاد يعني ورجع الفريق دوت ثاني الى المدينه بس كان معاهم بقى المره دي مصعب بن عمير مصعب بن عمير هذا الفتى

البراق الرائع مصعب بن عمير يا جماعه كان عنده في الوقت ده 20 سنه تخيلوا 20 سنه راح فتح المدينه داعيه 20 سنه يعني قد اغلب اللي حاضر قدامي دلوقتي في اللايف لان اغلبكم اعتقد شباب وبنات في جامعته يا جماعه مصعب بن عمير فتح المدينه وهو عنده 20 سنه كان سبب اسلام اسعد بن زراره و اسف اسلم على ايده اسيد بن حضر واسلم على ايده سعد بن معاذ وكل بقى الجبال اسلمت على يد مصعب بن عمير هذا الفتى الرائع عنده 20 سنه واصلا مات في غزوه احد يعني مات يعني سنه ما يقرب من 25 سنه وغير كل الواقع ده وهو اقل من 25 سنه انتم مش صغيرين يا جماعه انتم مش عيال انتم مش بنات تافهه انتوا مش شباب تافهه انت مش عيل صغير سيبك من النماذج اللي شبيهك اللي على التيك توك وعلى انستا واللي قاعدين يعملوا مقاطع ترفيهيه على الفيسبوك انتم كبار كبار لكن هو الواقع والمجتمع دا دايم بيعاملك على انكم عيال صغيره لكن اللي في سنك ده فتح المدينه اللي في سنك ده اسلم على ايده اسيد بن حضير سعد بن معاذ. المهم بقى من الناس اللي اسلموا بسبب مصعب بن عمير كان ابو ايوب الانصاري ابو ايوب الانصاري في الوقت دوت تقريبا كان عنده حوالي 27 سنه 27 سنه ماتكبرش ان هو يتعلم على ايد واحد عنده 20 سنه وما تكبرش ان هو يبقى شيخه اصغر منه بسبع سنين ايه المشكله يعني طالما اعلم مني طالما سبقتني الى الله ايه المشكله ان انا استفيد منه واتعلم منه.

فعلا كان اسعد ايام ابو ايوب الانصاري لما دخل في الاسلام وحسن اسلامه وكان حاجه جميله قوي وبعد كده بقى حصل الحاجه الجميله قوي اللي اول مشهد رهيب بيحضره ابو ايوب الانصاري واول منقبة من مناقب ابو ايوب الانصاري وهو انه حضر بقى بيعه العقبة الثانيه الله! نزل بقى سنه 13 سنه 13 من الايه سنه 13 من البعثة نزل ابو ايوب الانصاري مع مجموعه الانصار اللي راحوا يبيعوا النبي عليه الصلاه والسلام انتم عارفين بيعة العقبة الثانيه كانت سنه 13 من البعثة وكان حضرها 73 رجل وامراتان 73 رجل وامراتان من ال 73 اللي حضروا بيعه العقبة الثانيه كان العملاق بتاعنا والصحابي الجليل ابو ايوب الانصاري وكانت البيعه العقبة السنه دي بدايه الخير كله لان ديت البيعه اللي انتقل بيها الكلام لحته ثانيه الانصار بايعوا النبي عليه الصلاه والسلام على النصره والدفاع عنه ونصره دينه ومساعدته على تبليغ دعوته وان هم يحموه زي ما بيحموا نسائهم واولادهم وبايعوه على قتال الابيض والاحمر وبايعوه على قتل العلائق مع الناس وبايعوه على الجوع والعطش وبايعوه على كل حاجه لذلك اتسمت بيعه الرجال بيعه الرجال لان فيها قتال فمين بقى مين اللي كان حاضر البيعه الجميله ديت حضرها ابو ايوب الانصاري يا جماعه ابو ايوب الانصاري حضر كل حاجه بعد كده ابو ايوب الانصاري حضر بدر حضر بدر وحضر احد حضر كل المشاهد مع النبي عليه الصلاه والسلام لذلك في تعريفه يقولوا اسمه ايه ابو ايوب الانصاري البدري الخزرجي يعني حتى تلاقيه في الكتب السير يعرفوه كده يقولك كلمه البدرية دي يا جماعه ليها وزن بدري يعني حضر بدر يعني

دا من المغفور لهم ان الله اطلع الى اهل بدر فقال اعملوا ما شئتم فقد ايه؟ فاكربين فقد غفرت لكم فقد غفرت لكم ربنا غفر لاهل بدر عشان كده في تعريف ابو ايوب الانصاري يقول لك ابو ايوب الانصاري البدري الانصاري البدري الخزرجي خزرجي يعني من الخزرج يعني فهو من الخزرج من الانصار وهو بدري رضي الله عنه وارضاه حضر بيعه العقبة الثانيه وبايع النبي عليه الصلاه والسلام وصافحه بيده، ايده لمست ايد النبي عليه الصلاه والسلام ومن هنا بدأت ملحمة الحب تحصل بين ابو ايوب الانصاري وبين النبي عليه الصلاه والسلام وهنشوف خد بقى معلومه كده سريعه ونرجع لها ثاني ان ابو ايوب الانصاري اصلا من قرايب النبي عليه الصلاه والسلام قريبه من ناحيه جدته وزى ما هنشوف دلوقتي خلىنا نمشي مع بعض بس هو حس ان في بينهم ايه في بينهم روابط فهو قريبه وحبيبه بايعه ولمسه وسمع منه وصافحه فحصل بقى الايه التيار ده تيار الحب بين اب ايوب الانصاري وبين النبي عليه الصلاه والسلام ابو ايوب الانصاري رجع ثاني المدينه ينتظر هجره النبي عليه الصلاه والسلام خلىنا نقول معلومه كده ما قلناهش سريعه يعني مش تفرق معانا قوي بس اسم الاب والام نكتبهم مش هنخسر حاجه على فكره انا بحب اللي بيكتب معايا لان انا بحس ان هو مندمج ومصحح يعني اسم ام ابو ايوب الانصاري ايه؟ اسمها زهراء بنت سعد زهراء بنت سعد الخزرجيه يعني من الخزرج زهراء بنت سعد ده اسم الام اسم الاب اسم زيد بن كليب النجاري الخزرجي نجاري يعني من بني النجار والخزرجي يعني من الخزرج حتى في مسمى ابو ايوب الانصاري احيانا بيزودوا الكلمه دي يقولك ابو ايوب الانصاري البدري الخزرجي النجاري يعني ايه النجاري؟ مش النجاره نجاري يعني بني النجار ودول يعني ايه من سكان المدينه وهنشوف ايه علاقتهم بالنبي عليه الصلاه والسلام.

وحصل بقى بعد كده اهم لقطه في حياه ابو ايوب الانصاري لما النبي عليه الصلاه والسلام قرر يهاجر طبعاً قصه الهجره مش مش مقامنا ان احنا نتكلم فيها لكن خلاصتها النبي عليه الصلاه والسلام هاجر خلاص للمدينه ووصل الى قباء وانتم عارفين ان هي قباء دي كانت الايه المدخل للمدينه ممكن دلوقتي قباء تبان لكم اللي راح المدينه ان هي جزء من المدينه انت عشان تروح لقباء بتركب باص ولا بتركب اي حاجه ولا بتمشي تلاقي نفسك وصلت قباء فتحس ان قباء جوه المدينه زمان ما كانش الموضوع كده زمان كانت قباء يعني المدينه كانت هي البقعه اللي حوالين المسجد النبوي دي بس وبعد كده في فراغ وبعد كده في قباء فيقول لك نزل قباء فانت ما تستغربش فنقول ايه نزل قباء طب ما هو كده في المدينه، لا ما هي المدينه كانت اصغر من كده بكتير تمام زي ما احنا في المحافظات بتاعتنا مثلا تلاقي كان في مكان زمان كنا نعتبره بره المحافظه وبعد كده حصل توسع في المحافظه فدخل المكان ده جوه المحافظه نفسها فهي قباء كانت بره المدينه انت يقول لك على مشارف المدينه او مدخل المدينه وبعد كده انضمت طبعاً للمدينه مع التوسعات فانت مش حاسس ان

قباة بره المدينه ولا حاجه لكن النبي عليه الصلاه والسلام لما اقبل كان اول حاجه بيقابلها قباة فوصل النبي عليه الصلاه والسلام يوم الاثنين تمام 12 ليله خلت من شهر ربيع الاول ونزل الى قباة طبعاً اهل المدينه الانصار عموماً كانوا بينتظروا النبي عليه الصلاه والسلام هما عارفين ان هو هاجر بس هما مش عارفين هيوصل انهى يوم فكان من حب اهل المدينه للنبي عليه الصلاه والسلام ان هما كانوا كل يوم كل يوم يجوا من المدينه يوصلوا لغايه قباة ويطلعوا على المشارف والجبال والكلام ده وينتظروا النبي عليه الصلاه والسلام ساعات من اول ما الشمس تطلع لغايه ما يجي الظهر يحرق راسهم من شدة الحر وميلاقوش مكان يستظلوا بيه فكانوا يتعبوا قوي فيضطروا ان هما يرجعوا من شدة التعب كل يوم كانوا يطلعوا يعملوا كده فاليوم اللي وصل فيه النبي عليه الصلاه والسلام طلع كان الانصار طلعوا عادي في طلعتهم العاديه وقفوا يستنوه طول لغايه ما الشمس اكلت دماغهم تعبوا قوي فقالوا ايه احنا نرجع بقى نرجع ويمكن يجي بكره وهما راجعين وهما راجعين وصل النبي عليه الصلاه والسلام مين اللي شافه؟ يهودي كان في يهودي ساكن في المنطقه ديت طبعاً الموضوع زي ما نقول كده بالبلدي ترند يعني اللي كل كله متابع حتى اليهود متابعين الموقف حتى اللي مش عارف عرف فكان فيه يهودي قاعد في المكان دوت فشاف من بعيد النبي عليه الصلاه والسلام ومعاه ابو بكر طبعاً هو مش عارفه بس هو عارف ان العرب مستنين راجل مهم قوي وجاي لهم وبتاع فصر والانصار لسه مروحين قال يا معشر الانصار يا معشر الانصار هذا جدكم الذي تنتظرون هذا جدكم الذي تنتظرون يعني صاحبكم الذي تنتظرون رجع الانصار بحفاوه وتكبير وانفجر المكان بالتكبير لمقدم النبي عليه الصلاه والسلام وصل النبي عليه الصلاه والسلام ونزل في قباة يوم الاثنين تمام قعد الاثنين والثلاث والاربعاء والخميس قعد اربع ايام في قباة واسس مسجد قباة في هذا المكان وصل النبي عليه الصلاه والسلام طبعاً مصعب بن عمير اشتغل على الانصار في ناس كثير اسلموا وما كانوا يعرفوا شكل النبي عليه الصلاه والسلام فاختلط عليهم الامر في الاول طبعاً ابو بكر شكله فخم قوي شكله فخم قوي فالتبس عليهم هو مين فيهم النبي عليه الصلاه والسلام طبعاً الدنيا كانت حر قوي فالنبي عليه الصلاه والسلام جه قعد كده في مكان ما كانش لاقى ضل يضلله وابو بكر الصديق شاف في عينين الناس اللخبطة ديت كان في ناس بيجوا يسلموا عليه هو وناس يسلموا على النبي عليه الصلاه والسلام وهما محرجين يسالوا هو مين فيكم النبي عليه الصلاه والسلام فأبو بكر بسرعه بديهه وحركه ذكيه منه راح خلع ثوبه وضلل بيه النبي عليه الصلاه والسلام عمل ثوبه تمام خد ردائه وعملوا ضل للنبي عليه الصلاه والسلام ساعتها كل الناس عرفت مين ابو بكر ومين النبي عليه الصلاه والسلام النبي عليه الصلاه والسلام نزل عند صحابي اسمه كلثوم ابن الهمد نزل عنده في الفتره ديت وقعد عنده واسس مسجد قباة اول مسجد اسس على الايه على التقوى.

تمام وبعد كده قعد في المكان دوت وبعد كده اتحرك النبي عليه الصلاه والسلام هيخش
بقى المدينه وهو هيخش المدينه كان جه عليه بقى خلاص دخل يوم الجمعة فالنبي
عليه الصلاه والسلام صلى الجمعة في الطريق في ديار اسمها بني سالم بن عوف
الديار اللي هو كان فيها اللي هي اسمها قباء بيسموها ديار بني عمرو بن عوف ديار
ايه؟ بني عمرو بن عوف بعدكده هو مشى بقى هو في الحته اللي ما بين قباء وما بين
بقى الحته اللي فيها المسجد النبوي اللي هيبقى موجود بعد كده في ديار اسمهم ديار
سالم بن عوف المكان ده كان حضرت الجمعة وهو في المكان دوت ديار سالم ابن
عوف فجمع بهم عليه الصلاه والسلام وصلى اول جمعه يصليها في المدينه في هذا
المكان.

اللي حصل بقى ايه ان النبي عليه الصلاه والسلام من ساعه ما نزل قباء وهو بقى
بيستعد عشان يروح المدينه مين اللي طلع بقى علشان يستقبله وعلشان يدخله المدينه
وهو مسلح عشان يحموه لان المدينه لسه فيها ناس ما اسلموش فيها يهود في اعراب
مين اللي طلع تفكروا؟ اللي طلع بنو النجار مين بنو النجار دول بقى يا جماعه؟ دي
بقى قصتنا يعني ايه نجاري **ويعني ايه بنو النجار؟** بنو النجار دول يا جماعه قرايب
النبي عليه الصلاه والسلام من المدينه طب القرابه دي جت منين؟ اللي حضر معانا
الدرس رقم ثلاثة في السيره يفهمني كويس لان احنا شرحنا النسب النبوي والعلاقات
اللي في النسب النبوي لكن باختصار انتوا عارفين النبي عليه الصلاه والسلام محمد
بن عبد الله ابن عبد المطلب ابن هاشم صح؟ هاشم تزوج واحده من المدينه اسمها
سلمى وهي سلمى دي اللي انجبت اللي انجبت عبد المطلب تمام هاشم اتجوز ايه
سلمى سلمى من المدينه اصلا من بني النجار سلمى من بني النجار هاشم اتجوز سلمى
وانجب منها عبد المطلب هو ما كانش اسمه عبد المطلب اسمه شبيه اسمه الحقيقي
شبيه بس بعد كده اتسمى القصة طويله برضو اتسمى عبد المطلب وعاش في المكان
ده يعني عاش في المدينه وبعد كده اعمامه بقى اخدوه رجعوه مكه تاني ببقى اذا جدة
النبي عليه الصلاه والسلام اللي هي سلمى ديت اللي هي مرات هاشم دي من بني
النجار اذا جدة النبي منين؟ من المدينه من بني النجار عشان كده تسمع في السيره
يقول لك ان النبي عليه الصلاه والسلام اخواله يعني خالنه يعني اخواله من بني النجار
فاخت جدك او اخو جدتك اخو جدتك ببقى خالك صح؟ فبتعتبر بني النجار اخوال
النبي عليه الصلاه والسلام فهم بيعتبروا نفسهم زي يقول لك كده ولاد خالي فبنو
النجار ولاد خال النبي عليه الصلاه والسلام كلهم وده بيرجعني تاني هو ليه بقول لك
ابو ايوب الانصاري قريب النبي عليه الصلاه والسلام هو قريبه فعلا هو يعتبر ابن
خاله بس ابن خاله الكبير يعني ابن خاله الكبير قوي فبنوا النجار عموما كانوا دايم
بينصروا النبي عليه الصلاه والسلام وكانوا في ضهره دايم فلما وصل المدينه مين
اولى الناس بيه؟ بنو النجار فطلعوا معاهم السلاح وطلعوا معاهم بقى الفرسان والكلام
ده علشان يحفوه ويدخلوه المدينه وفعل النبي عليه الصلاه والسلام دخل المدينه في

حراسه بني النجار لما دخل بقى حصل بقى ايه الحدث الخطير ايه هو الحدث الخطير
بقى ان النبي عليه الصلاه والسلام هيخش المدينه دلوقتي هيروح فين هو مالوش بيت
هو مالوش بيت في المدينه لسه لا المسجد النبوي اتبنى ولا اتبناله بيوت لزوجاته لا
المسجد النبوي اتبنى ولا اتبناله البيوت لزوجاته هو دلوقتي النبي عليه الصلاه والسلام
متجوز مين؟ متزوج اثنين دلوقتي بعد موت خديجه تزوج سوده بنت زمعه وتزوج
عائشه بنت ابي بكر فالمفروض يتبناله بيتين دلوقتي بيت لسوده وبيت لعائشه بس هو
لا المسجد اتبنى ولا البيوت اتبنت طب انا روح فين دلوقتي فدخل النبي عليه الصلاه
والسلام بعد ما دخل بقى كل الناس كل ما يقابل حد يقوله تعالى عندنا تعالى عندنا هلم
الى العده والعتاد هلم الى العده والعتاد والضيافه فالنبي عليه الصلاه والسلام قاللهم
سيبوا الناقه ماحدش يمسك الناقه كانوا بيشدوا الناقه قال دعوها فانها مأموره دعوها
فانها مأموره يعني ايه مأموره؟ يعني ربنا اوحى ليها تقف فين ما حدش يجي جنبها
مش انا اللي وقفها ربنا اللي هيوقفها في مكانها وفعلا قعدت الناقه تلف كده تروح
وتيجي وبعد كده قعدت في مكان المسجد النبوي بالظبط وبعد كده قامت كده خدت لفه
تانيه ورجعت نفس المكان تاكيد ان هي ما قعدتش صدفة هي قاعده مقصوده وقعدت
تاني في مكان المسجد الايه النبوي فالنبي عليه الصلاه والسلام قال هو هنا انا هنزل
هنا طيب طبعا النبي عليه الصلاه والسلام فرح قوي ان الناقه وقفت هنا ليه؟ علشان
المكان اللي واقف فيه اصلا دي ديار بني النجار وهو كان عايز زي ما بيقول كده
يجبر بخاطرهم يعني ما ينفعش استقبلوني ودخلوني وبعد كده يعني اروح لحد تاني
فكانه في قلبه كده يعني بيقول يا رب الناقه تقف عند بني النجار علشان عايز يعني
عايز اراضيهم يعني وفعلا ربنا جبر بخاطره وانتم عارفين يعني ربنا يعلم ما في قلب
النبي عليه الصلاه والسلام واي حاجه بيتمنها حتى لو في قلبه ربنا بيعملها قد نرى
تقلب وجهك في السماء فلنولينك ايه قبله ترضاها فعلم الله ما في قلب النبي عليه
الصلاه والسلام ان هو يتمنى بس ان الناقه تقف عند بني النجار وفعلا وقفت عند بني
النجار هنخش في المشكله التانيه بقى مين من بني النجار هياخده او هيضايفه؟ هو
كذا واحد دلوقتي جنبنا فبدا يطلع الناس قبل بقى ما يحصل خلاف من بني النجار
النبي عليه الصلاه والسلام حسم الموضوع بكلمة علشان يخلص الموضوع دوت قال
اي ديار اهلنا الي اقرب؟ انا هنزل في اقرب بيت لمكاني ده دلوقتي كلكم على راسي
من فوق بني النجار على راسي بس لازم ايه لازم واحد هياخدني في الاخر مين
اقرب بيت الان ليا وانا في مكاني ده؟ اقرب باب اقرب باب هخشوا فكان اليوم السعيد
وكان اسعد ايام ابي ايوب الانصاري وكان يعني الخير كله عم على ابي ايوب
الانصاري ان سبحان الله ببركه ربنا ان طلع اقرب باب للنبي عليه الصلاه والسلام
في اللحظة دي باب بيت ابي ايوب الانصاري فراح جري ابو ايوب الانصاري قال
له انا يا رسول الله انا انا اقرب واحد وخد بقى المتاع بتاعه والرحل بتاعه وخد
الحاجات اللي على الناقه وراح جري دخل بيها جوه البيت قبل ما ايه قبل ما اي حد
يتكلم اي كلمه سبحان الله خد المتاع بتاعه ودخل بيها فالناس بقى ايه قالوا للنبي عليه

الصلاه والسلام خلاص بقى ابو ايوب الانصاري خد المتاع بتاعك خد الشنط والحاجات ديت تعالى بقى عندنا قال المرء مع متاعه المرء مع ايه مع متاعه فقال عليه الصلاه والسلام المرء مع رحله يعني يعني ايه الكلام دوت خد بالك ما الكلمه دي ليها حكمه يعني ايه يعني كانه عايز يقول يعني ما يصحش يبقى واحد خد رحلي خد شنطي خد حاجتي يحطها عنده وبعد كده اكسر بخاطره وأروح لحد ثاني يعني حتى ايه مش ذوقيا مش احسن حاجه وطبعا النبي يعمل اللي هو عايزه عليه الصلاه والسلام لكن برضو بيأسس ادبيات يا جماعه ادب ادب رغم ان هو ما فيش حد ليه عنده حاجه يعمل اللي هو عايزه وينزل عند اللي هو عايزه بس عمل ايه بيحط قاعده هو الاول قال الناقه هي اللي هتحدد المكان طبعا باذن ربنا خلاص بنو النجار كده حط قاعده انا هروح اقرب بيت انا معرفش مين اقرب بيت طلع أبو أيوب انصاري خد راحله قالوا له طب هو خد راحلك تعالى انت بقى معانا قال لا ما ينفعش ازاي يعني واحد ياخذ شنطي وواحد حاجتي وعامل معايا واجب اكسر بخاطره ووارواقعد عند أضياف عند حد ثاني حتى ما مش ذوقيا مش حلوه كده كسرت بخاطره والنبي عليه الصلاه والسلام بيراعي الخواطر قوي قال انا روح مع ابو أيوب الانصاري.

مين بقى اللي جري قال لك الحق اي حاجه؟ اسعد بن زرارہ اسعد بن زرارہ خد الناقه بتاعه النبي عليه الصلاه والسلام خد بالك هو الكلام دلوقتي ابو ايوب الانصاري خد الرحل الرحل يعني اللي هي الحاجات اللي على الناقه كلها وطبعا النبي رحله عليه الصلاه والسلام اسعد بن زرارہ خد الناقه خد الناقه يعني كأن الرساله ايه يعني اذا لم تتل شرف يعني ضيافه النبي عليه الصلاه والسلام فلتتل شرف ضيافه ناقة النبي عليه الصلاه والسلام وكأن رساله من اسعد بن زرارہ يعني ايه يعني حتى لو فاتك ايه الخير مايفوتكش نص الخير ربع الخير يا سيدي يعني اعمل اللي تقدر عليه اللي يتيسر لك اعمله ما تبقاش هي دي لو ما دي مش جاي معاكم ماشي فاسعد بن زرارہ اخذ الايه اخذ الناقه واحسن اليها وكان كل بيهياها ويأكلها ويشربها كان النبي عليه الصلاه والسلام يلاقىها جاهزه دايمًا على الايه على الركوب فده من مساعده الداعيه ومن مساعده الرسول عليه الصلاه والسلام ان انت داعيه توفر له عربيه مثلا توديه درس دعوي ما هي دي مساعده مهمه هو ما كانش هيروح الدرس من غير كده ان انت تيسر له مشاويره وتسهل له اموره وتخلص له اتفاقاته ما هو ده مهم ما هي الدنيا مش تمشي غير كده فاذا الادوار اللي حوالين الداعيه كلها ادوار مهمه ممكن الدنيا تقف على دور من الادوار ديت فما تستهترش باي دور المهم كان اليوم السعيد الموعود الجميل لابي ايوب الانصاري لما دخل النبي عليه الصلاه والسلام الى بيته وطبعا بيت ابو أيوب الانصاري بيت بسيط يعني هو عباره عن دورين بالظبط دورين يعني ما فيش بقى لا ناطحه سحاب ولا في يعني ما فيش بقى اي وسائل من وسائل الترفيه هو بيت عادي يعني فأبو أيوب الانصاري قبل ما النبي يوصل كان محضر مضبوط الدور العلوي ومجهزه تماما لإستقبال النبي عليه الصلاه والسلام فلما وصل النبي

عليه الصلاه والسلام قال له يلا اطلع فوق قال له لا فوق ايه ما بلاش فوق قال له يا ابا ايوب انه ارفق بي ان اكون في الاسفل ليه تحت اصل انا بيجيلي يعني بيجيلي ضيوف كثير وبرضو لو انا طلعت فوق لازم كل هيجي يطلع فوق فممكن يجرح البيت بعينه بص الادبيات يا جماعه والذوقيات انا اتضايفت عند حد اختار مكان انا بيجيلي ضيوف فمش عايز اذيك انا بجيلي ضيوف كثير لو انا طلعت فوق كل شويه رجل طالعة ورجل نازلة ويجرحوا البيت وناس تطلع وناس تنزل وكمنا السلم مين قال السلم هيسحمل هو السلم يا جماعه عباره عن شويه خشب ونخل وبتاع يعني مش برضو ما ممكن الدنيا ما تستحملش وكمنا ممكن يجيلي عدد كبير خليني تحت احسن شوف بيفكر في ايه بيفكر في مصلحته هو مصلحه ابو أيوب الانصاري تمام بيقوله ده ارفق يعني ان انا ابقى انا ايه ابقى انا تحت فعلى مضد يعني قال له ماشي بس انا يعني ازاي يعني ابقى انا فوق وانت تحت مش جايه معايا يعني قال له يا رسول الله يعني انا مش قادر اتخيل ان انا كيف يكون ابو ايوب في العلو وانت في السفلى طب ما ده يعني ده دور مش مالهاش علاقه ان انت هو شايفها ان شايف ده عيب يعني شايف ده غلط فمينفش بيقى انا ابقى فوق المهم ابو أيوب الانصاري مش عارف يعمل ايه فاضطر ان هو يطلع فوق طلع فوق راح كان بيتحرك مع زوجته فوق عادي هو وزوجته طلعا فوق بيتحرك انتم عارفين السقف ما كانش زينا كده اللي هو بقى اسمنت وكده السقوف يا جماعه كانت عباره عن ايه جريد نخل وبعد كده بيحطه بيحطوا طين وخلص طين كده ينشف خلاص ده بقى ايه دور شويه جريد وشويه طين ده دور فلو انت مثلا هببت شويه خبطت برجلك كده على السقف ممكن التراب ينزل من السقف على اللي تحت ترابه كده تنزل من السقف على الشخص اللي تحت بسبب خبطه رجلك على الارض بتاعه الدور الثاني فده اللي حصل ان ابو أيوب الانصاري ماشي مع زوجته فبيخبط برجله فقعد يتخيل بس يتخيل بس ان في ترابه دلوقتي نزلت على راس النبي عليه الصلاه والسلام تعب قوي مش قادر مش قادر يستوعب ان ممكن حاجه زي كده تحصل منه فاضطر ان هو يخلي قال لزوجته هنقعد على جنب بص هيعمل ايه دلوقتي قالها احنا هنقعد على جنب مش هنمشي في الدور ممنوع نمشي في الدور ماينفعش رجلي تبقى فوق راس النبي عليه الصلاه والسلام ماينفعش اتخيل ان خبطه رجلي تكون نزلت ذره تراب على راس النبي عليه الصلاه والسلام قال لزوجته هنقعد في طرف الاوضه طول الليل ماحدش يتحرك وهنقعد هنا وفعلنا خذ زوجته وقعدوا في طرف الغرفه وقعدوا الليله كلها هناك وبعد كذا نزل للنبي عليه الصلاه والسلام قال له يا رسول الله يعني كيف يعني اعلو سقيفه انت تحتها؟ يعني بالله عليك اطلع فوق كيف اعلو سقيفه انت تحتها مش قادر استوعب ان انا كده فقال له معلش يا ابو ايوب هو ارفق بنا يا ابو ايوب يعني هذا ارفق بنا يا ابو ايوب هون عليك الموضوع بسيط مش مستاهلة انت مكبر الموضوع قوي فقال له ماشي طالع ابو أيوب الانصاري وبعد كده حصلت مشكله كبيره بقى هو خلاص قرر هو مراته هيقعدوا على جنب كان عندهم غطا كده بيدفوا بيه من قطيفه كانوا بيغطوا

بيه بالليل من قطيفه كده فالمهم عادي هما كانوا بيتغطوا بيه وبتاع انتوا عارفين بالليل الجو بيبقى ساقع برضو جو صحراوي فحصل في اليوم ده ان في ميه اتكبت على وقعت هو ما ماشيين خبط حاجه فيها ميه الماء ده نزل سرح بقى في الارض يا ربي ابو ايوب الانصاري بقى ومراته بقوا يبجروا يبجروا عشان ينضفوا الميه قبل ما نقطه ميه تنزل على النبي عليه الصلاه والسلام راح مسك القطيفه اللي بيتغطي بيها وقعد يمسح بيها الارض يمسح بيها الارض لغايه ما مسحها من الميه تماما بس طبعاً الغطا ما بقاش ينفع يستعمله فباتوا الليله دي سقاعنين جدا كان هيتجمدوا عشان ما تغطوش هيتغطوا ازاي بقطيفة بغطا مبلول ميه فقال لك مش مهم الغطا المهم ننصف بسرعه قبل ما تنزل نقطه على النبي عليه الصلاه والسلام وبعد كده تاني يوم حكى له بقى اللي حصل قال له حصل كده كده كده بالله عليك اطلع فوق معلش عشان خاطري عشان خاطري اطلع فوق انا مش هينفع اعيش كده ده انا تعبت تعبت مش قادر اتخيل انا بعاني فوق عشان حضرتك تحت فاخيرا النبي عليه الصلاه والسلام وافق يعني اشفق على ابو ايوب الراحل تعب قوي يعني تعب فاشفق عليه النبي عليه الصلاه والسلام وقاله خلاص وفعلا طلع النبي عليه الصلاه والسلام اخيرا فوق وابو ايوب اخيرا قعد ايه قعد تحت قعد تحت خدوا بقى القنبله بقى طبعاً ابو ايوب الانصاري بقى بيته مقر الدعوه خلاص النبي عليه الصلاه والسلام قاعد قاعد معاه وده مقر الدعوه دلوقتي فبقى بيت ابي ايوب الانصاري بقى عامل زي دار الارقم كده اللي كان في مكه بس ده في المدينه بس انا عايزك بس امشي معايا كده في تخيل عشان اوصلك للايه للقنبله اللي عايز اقولها لك احنا يا جماعه لو انت شفت النبي عليه الصلاه والسلام ايه رايك ايه رايك تشوفه تقول لي ده انا ده الدنيا وما فيها ده انا نفسي اشوفه ثانيه واحده ثانيه واحده بس انا نفسي اشوفه في المنام في المنام بس حلم حياتي طب لو شفته شفته بجد تقول لي يا نهار ابيض ده الدنيا وما فيها طب ايه رايك تسلم عليه ويكلمك وتكلمه تقول لي لا ده انا ده انا كده ده انا ممكن اموت فيها طب ايه رايك يقعد معاك قاعده طويله ساعه ساعتين ثلاثه تقول لي خلاص انا اصلا انا رحت منك من زمان انت كده بتتعامل مع خلاص انا ضعت انا مش قادر اتخيل انا جسمي اشعر يعني ايه النبي يقعد معايا ساعتين ثلاثه ده كتير قوي ازاي يعني طب لو ايه رايك لو جه بات عندك ليله تقول لي يا نهار ابيض ده احنا زارنا النبي زي ما المصريين بيقولوا احنا بقى بيقى زارنا النبي فعلا و ده يوم المنى ده انا بيتي ده انا مش مش هسكنه تاني هققله كده وخلاص واقول هذا المكان دخله رسول الله صلى الله عليه وسلم سيبه بقى زي ما هو كده لو بات عندك ليله انا مش متخيل انا جسمي قشعر دلوقتي خد بقى منقبة ابو ايوب الانصاري النبي عليه الصلاه والسلام قعد في بيت ابو ايوب الانصاري سبعة اشهر سبع اشهر في بيت ابو ايوب الانصاري يا الله! تخيل النبي عليه الصلاه والسلام يقعد في بيتك سبع شهور بتاكله وتشربه وتسلم عليه وطالع ونازل وصلاه وبينك وبينه سقف اي حاجه وبتخدمه وبيسلم عليك وبيقول لك كلام حلو وبيشكرك كل يوم على.. سبع شهور طبعاً انتوا متخيلين ان هو قاعد عنده مثلاً

تلات اربع ايام لا قعد سبع شهور عند ابو أيوب الانصار يا جماعة ما حصلتش لحد في التاريخ ما حصلتش لحد في التاريخ دي ان حد يقعد عنده النبي في بيته في بيته سبع شهور كثير قوي قوي قوي لدرجه يعني يا بختك مش كده يا بخت ابو أيوب الانصاري يا بختك يا أبو أيوب الانصاري النبي يقعد في بيتك سبع شهور ده لو النبي عدى بس كده لو بصلي بصة انا انا ممكن يحصل لي حاجه بتقوللي يقعد سبع شهور عند واحد دي ده خلاص كده انا كده خلصت انا اقل قصه كده سلام سلام انت عايز تقول ايه في ابو أيوب الانصاري اكثر من إن النبي قعد عنده سبع شهور سبع شهور سبع شهور بيقابل كده يسلم عليه ويصافحه ويشكره ويقول كلام حلو وينزل معاه ويروح معاه ويجي معاه ويخدمه وياكله ويشربه يااه موضوع كبير قوي يا جماعة انا مش قادر اتخيل سبع شهور بيت النبي عليه الصلاه والسلام هو بيت ابو ايوب الانصاري لغايه بقى ما اتبنى المسجد النبوي المسجد النبوي كان برضو قعد فتره كبيره يتبنى على ما حفروا واسسوا طلوعوا بيه وبعد كده بنوا بيتين للنبي عليه الصلاه والسلام بيت لسودة رضي الله عنها ارضاها بيت لعائشه رضي الله عنها ارضاها وبعد كده اخيرا طلع النبي عليه الصلاه والسلام من بيت ابي أيوب الانصاري وسكن بقى مع سوده في بيتها وبيعهدي على عائشه والكلام دوت بس خليني بقى اسالك سؤال بقى ايه بيني وبينك كده طب احنا شفنا ادب ابي أيوب الانصاري عشان كده مش هو انا قلت لكم احنا ليه بنحب أبو أيوب الانصاري يا جماعة عشان اللي حصل ده واحد كان قاعد مع النبي سبع شهور وازاي ما تحبوش يعني! ده لازم يكون يعني بص ناله كميه بركات وكميه خيرات تتوزع على الكوكب فلان اول ما بسمع بيقول انصاري بحبه انا مش عارف بحبه ليه بس بتحبه عشان الجميله اللي عملها ديت ايوه صح والله يعني يا وجع قلب ابو يوب الانصاري والنبي طالع من بيته بس هو ما طلعتش بعيد هو طلع راح بيت اللي جنبه لان هو اصلا بيت ابو ايوب اقرب بيت للمسجد النبوي فبيت بقى بيت النبي عليه الصلاه والسلام اقرب جار لي ابو أيوب الانصاري اقرب جار ليه مين؟ ابو ايوب الانصاري فمراش بعيد يعني بس انا عايز اسالك سؤال بيني وبينك كده تخيل مثلا مثلا ما ترعلش مني بقى ناقه النبي عليه الصلاه والسلام كانت داخله البلد بتاعتكم وبركت قدام بيتك فجاه فجاه وحي فجاه بركت قدام بيتك انت فالنبي بص كده قال خلاص انا هبات فاقرب شقه هنا طلعت شقتك فجاه فجاه ومره واحده لقيت النبي عليه الصلاه والسلام داخل عليك قاللك انا هاجي ابات عندك طبعا انت فرحان هتموت من الفرح بس دماغك فيها 600 حاجه جوه دلوقتي عايز اخلص منها قبل ما النبي يخش الاغاني التلفزيون اللي شغال الموسيقى اللي شغاله جوه الهدوم اللي مش تمام المصحف المصحف فين يا جماعة خبينا فين الحاجات الحرام اللي عندي في البيت دي كلها علبة السجاير يا جماعة حد خبي العلبة يا ابني يا ابني يطفى التلفزيون يا ابني يا جماعة ما حدش يطلع حدش شغل الموسيقى الاغاني خلاص مافيش ماحدش اوعى حد يفتح الدولااب عشان ماحدش يشوف الهدوم اللي بنزل بيها هتلق تعمل ايه ولا ايه هتلق تعمل

ايه ولا ايه طب انت هتقول له استنى بره شويه؟ ما يصحش هيخش على الوضع ده مصيبه يا فرحه ما تمت يا فرحه ما تمت وانت قلبك مجروح وهو داخل بيشوف كل دوت طب انت راعيت نظر النبي عليه الصلاه والسلام ما راعيتش نظر الله ليه؟ ما ربنا بيرى ده صباح مساء هو ربنا هو رب النبي عليه الصلاه والسلام هو اللي في ايده الجنه والنار هو اللي في ايده كل حاجه ليه ما بتستحيش وهو معكم اينما كنتم والملائكه معاك في البيت الا تستحي من الملائكه وان عليكم لحافظين كراما كاتبين يعلمون ما تفعلون.

الإباحيه اللي على موبايك الملايكه متابعها الصور الشمال الرابات والمهرجانات اللي أنت حاشي بيها موبايك كل ده منظور ، هدم التبرج اللي ماليه دولابك كل ده منظور ليه أنت بس دلوقتي اتكسفت وشك أحمر هوان النبي يخش إزاي وأنا بيتي كده طب ما الملايكه جوه بيتك طول النهار والليل وربنا مطلع عليك طول النهار والليل.

ف النهارده نأخذ واجب يا جماعه من قصه أبي الأنصاري الواجب بيقول ماذا لو كنت أنت أبو أيوب الأنصاري هل بيتك مستعد لإستقبال النبي عليه الصلاه والسلام ده في مشكله ثانيه خد بالك في مشكله ثانيه طبعاً إحنا شايلين هم مشكله هتحصل هو النبي عليه الصلاه والسلام لما يصحى يصلي الفجر عادي هيلاقينا صاحين ولا هيتصدم إيه يا جماعه هو أنتو ما بتصلوش الفجر ولا إيه أنا جاي بيت كفار ولا مسلمين وفين الناس اللي بتصلي طبعاً هو ده ده لو ما تكلمناش في قيام الليل كمان يعني ده ما هو هيقوم قبل قبل الفجر بثلاث أربع ساعات يصلي

{ إِنَّ رَبَّكَ يَعْلَمُ أَنَّكَ تَقُومُ أَدْنَىٰ مِنْ ثُلُثَيِ اللَّيْلِ وَنِصْفَهُ } [سُورَةُ الزَّمَلِ: ٢٠]

نفترض إن هو تجاوز عن قيام الليل هيلاقى صلاه الفجر واحد قام وأحياناً مفيش ولا واحد بيقوم في البيت ساعه صلاة الجماعه هو ما فيش حد نازل يصلي ولا إيه أنا هزل أصلي لوحدي هو أنتوا ما بتصلوش في المسجد ليه يا رجاله ؟

ها هيشوف إيه ولا إيه هيشوف ايه ولا ايه.

فلو سمحت خد الواجب بتاع النهارده ماذا لو زارني النبي صلى الله عليه وسلم و كنت أنا أبو أيوب الأنصاري؟

وحضر بيتك لاستقبال النبي عليه الصلاه والسلام لأن بيتك فعلاً فيه ضيوف غاليين قوي هم الملائكه الكرام وهو تحت نظر الرب سبحانه وتعالى .

أبو أيوب الأنصاري كان بعد كده بيعمل حاجه جميله أوي مع النبي عليه الصلاه والسلام طبعاً أبو أيوب الأنصاري هو والنبي بقى بينهم عمار زي ما بيقولوا كده يعني خلاص بقى في ود أوي تخيل واحد أنت عشت معاه سبع شهور زي دا تقدر تقول كده ما بقاش فيه كلفه فالنبي عليه الصلاه والسلام بقى بيقبل من أبو أيوب

الأنصاري حاجات ممكن ما يقبلها من أي حد زي إيه يعني أبو أيوب الأنصاري كان بيعمل حاجه بيثبتها مع النبي عليه الصلاه والسلام كان بيقول للنبي عليه الصلاه والسلام كل يوم تعدي علي في الوقت اللي أنت تختاره وأنا محضر لك طعامك فهو حتى بعد ما مشي قال له طعامك عندي دايماً فلما أي وقت راجع داخل بيتك تيجي تعدي عليا هتلاقي طعامك جاهز تأخذه هو ما بيروح لوش ان هو مش عارف ظروفه فهو ما بيرضاش يعني عشان بيوت زوجاته وكده فهو بيقول له يعني بعد اذنك معلش عدي أنت ع عشان أنا استحيي إن أنا أجيلك البيوت بتاعتك وكده أنا معرفش أنت موجود ولا لا واستحي يعني إن هو يطرق بيوت سودا وعائشه وكده كده في منينهم زي ما قلنا دلال وكده فعادي فالنبي عليه الصلاه والسلام قبل منه ذلك و كان فعلا عدي عليه كثير ياخذ منه الطعام لو ما عداش خلاص هو قاله لو ماتش يبقى خلاص يبقى أنت مثلاً كلت بره أي حاجه المهم أنت أكلك عندي دايماً كل يوم أكلك عندي عديت عديت معدتش خلاص أنا هشيله تمام وما فيش أي مشكله فكان النبي عليه الصلاه والسلام أحياناً يعدي على أبو أيوب الأنصاري يأخذ طعام وأحياناً ما يعديش وعادي والدنيا ماشيه فمره أبو أيوب الأنصاري حضر له طعام وكده فالنبي عليه الصلاه والسلام طبعاً أبو أيوب الأنصاري كان بيعمل حاجه حلوه قوي كان لما بيعت للنبي عليه الصلاه والسلام طعام كان لما النبي يرجع الوعاء اللي فيه الطعام كان أبو أيوب الأنصاري يتتبع أيد النبي عليه الصلاه والسلام وأكل منين ويروح يأكل من نفس المكان اللي أكل منه النبي عليه الصلاه والسلام ف ده في تبرك جائز تبرك مشروع بالنبي عليه الصلاه والسلام وبأثار النبي عليه الصلاه والسلام بس مره كده الأكل راجع زي ما هو بتتخض أبو أيوب الأنصاري النبي ما أكلش في مشكله كبيره فراح له قال له إيه المشكله أنت ما أكلتش ليه من الأكل فطالع إن السبب إن الأكل كان فيه توم وبصل ني توم وبصل ني مش اللي هو المطبوخ يعني ف كان في توم وبصل فهو قال له معلش أنا ما قدرتش أكل المره دي علشان كان في الاكل فيه ايه فيه توم وبصل و وأنا ما ايه يعني أناجي من لا تناجي فالنبي عليه الصلاه والسلام علشان بيصلي كثير وكده فقال له يعني أنا ما قدرتش أكل من الاكل عشان أنا مش بحب اكل التوم والبصل مش بحب أكل التوم والبصل الني لأنه بيعمل رائحه كريهه وأنا بصلي كثير وبقابل ناس كثير وكده فأنا مش بحب أكل التوم والبصل ني قال له طب هو حرام قال له لا مش حرام بس أنا ما بحبوش تمام فخلاص عرف أبو أيوب الأنصاري النبي عليه الصلاه والسلام مش بياكل التوم والبصل الني ممكن مطبوخ عشان ريحته بتروح لكن ني لا تمام .

وهو النبي أصلاً عليه الصلاه والسلام كان بيقول من أكل بصلاً أو ثوماً فلا يقربن مسجدنا. يعني ما ينفعش تخش مسجد وريحتك كريها فلازم الأول تزيل الريحه دي

وبعد كده تروح تصلي في المسجد .فبالك بقى بال روح وريحته سجائر وريحته كريهه
لا ما ينفعش ده يكره ذلك إنسان يصلي على الوضع دوت .

المهم دي بردو لقطه من لقطات أبو أيوب الأنصاري من اللقطات الخطيره في حياه
أبو أيوب الأنصاري إن مره النبي عليه الصلاه والسلام طالع من بيته طلع من بيته
في اللحظه اللي هو طلع فيها النبي عليه الصلاه والسلام من بيته كان أبو بكر طالع
من بيته وعمر طالع من بيته في مصادفه كده إيه ليها سببها يعني المهم اللي حصل
إن عمر رضي الله عنه أرضاه لقي أبا بكر هما الاتنين طالعين في وقت مش فيش
حاجه طلع لها فعمر لقي أبا بكر وقال يا أبا بكر ما الذي أخرجك هذه الساعه انت ايه
اللي طلعك دلوقتي قال والله ما اخرجني الا الجوع يعني بيقول طبعاً الاوضاع في
المدينه كانت صعبه جدا جدا فما تتخللوا فكان أحياناً بيأتي عليهم أوقات فعلاً لا
يجدوا الطعام قط قط مافيش لقمه تتأكل في البيت والنبي عليه الصلاه والسلام كان
ممكن يقعد بالشهرين لا يوقد في بيته نار كان ممكن يكون أغلب طعامه التمر والماء
فتخيل بس .

فسيدنا عمر بيقول لسيدنا أبو بكر أنت ايه اللي طلعك قال له الجوع الجوع يعني ايه
يعني ه بيطلع لما يحصل حاجه زي كده بيطلعوا هو طبعاً الصحابي بيبقى عنده عزه
نفس إن هو ما يرضاش يروح مثلاً يقول لحد أديني أكل وفي نفس الوقت هو جعان
طب أعمل ايه فبيطلع زي ما بيقولوا كده ربنا يسهل يمكن يقابل حد مثلاً يدعوه إلى
طعام يمكن يجد سفره في أي مكان ف يعني يتعزم ويأكل وبتاع فما يكونش في جرح
ليه يعني فقال له انت ما الذي اخرجك يا عمر قال والله ما أخرجني الا الذي اخرجك
جعان برضه مش لاكل ما فيش أكل خالص يا جماعه والصحابه تعبوا أوي والله تعبوا
جدا عشان إحنا نبقى مسلمين وصلوا الايام ما كانوش بياكلوا فيها ولا يشرّبوا بعد ما
كانوا ايه ابو بكر كان وضع اجتماعي كبير جدا في مكه وعمر من بني عدي يعني
وضع كبير أوي في مكه بص وصلوا لإيه وصل منهم ما كانش يلاقي يأكل عشان
أنت تبقى مسلم دلوقتي وأحنا شفنا أهلنا في غزه يعني وصل بيهم من أجل الإسلام أن
هما ماكلوش بالايام والليالي فسبحان الله احنا بنشوف دلوقتي احوال من احوال
الصحابه .

مشوا هم الاتنين قالوا طيب يلا بينا نمشي مع بعض لقوا مين بقى لقوا النبي عليه
الصلاه والسلام الله .

فقال لهم أنتوا ايه اللي أخرجكم؟ قالوا له والله ما اخرجنا الا الجوع فقال عليه الصلاه
والسلام وانا والله ما اخرجني غير ذلك يعني انا برضو عندي نفس المشكله قوموا بنا
بس النبي عليه الصلاه والسلام بقى عنده حل ايه هو الحل عنده يروح الي أبو أيوب
الأنصاري عادي وزى ما قولنا إن مافيش إن النبي عليه الصلاه والسلام مافيش كلفه
بينه وبين أبو أيوب الأنصاري يعني مافيش حتة زي أبو بكر وعمر مثلاً ممكن يقولك

يعني ما ينفعش أروح لحد أقوله أكلني مثلا لأن في كلفه بتمنع من إن أنا أطلب يعني برض عزه نفسه وكده لكن أنت حتى إحنا في بينك وبين ناس كده ليك أصحاب معينين ما فيش بينك وبينهم كلفه أبدا حتى مثلا مثلا تلاقي ممكن مثلا يكون شخص وقور بين الناس وبتاع ليه كده ثلثه أربعة أصحابه مافيش ب ما فيش كلفه يعني هزار وضحك واكل وشرب واخذ اكلك وتاخذ اكل وايدي في جيبك وايدك في جيب عادي احنا حبايب قوي لدرجه ان مافيش ما بينا الكلام ده.

فالنبي عليه الصلاه والسلام عنده حل ما يجرحش قيمه الإنسان ولا يكسر كرامتهم ولا اي حاجه أبو أيوب الأنصاري حبيبي يعني أنا متعود خلاص مافيش عندنا مشكله في إن أنا اطلب منه اي حاجه مافيش اي حرك في كده وفعلا قاللهم طب تعالوا معايا بقى انا هتغزم عند ابو الانصاري حبيبي وعادي يعني ما تفلقوش خدهم وراح طرق الباب ففتحت أم أيوب اللي هي امراه أبو أيوب الانصاري فقالت مرحبا بنبي الله وبمن معه يا مرحب يا مرحب وا أم أيوب ليها قصه كبيره هنشوفها كمان شويه فقال أين أبو أيوب ؟ سمع أبو أيوب الأنصاري الصوت وكان هو قريب من البيت كان في نخل كده كان هو بيجمع تمر من نخل فجري نزل من ال نخل جري اسرع الى النبي عليه الصلاه والسلام وقال يا رسول الله يعني ما الذي جاء بك هذا ليس هو الوقت الذي تاتي فيه عاده يعني هو زي ما قلنا متفق معاه ان هو دايم بيعدى عليه في وقت معين كده ممكن ياخذ طعام وبتاع بساله أنت جاي في وقت غريب عمرك ما جيتلي في الوقت دوت في حاجه قال صدقت صدقت فشاف المنظر فهم على طول يعني الصحابي مش محتاج غير نظره واحده يفهم يعني مضطرش النبي يقول له قال له صدقت يعني افهم يعني لوحذك انا جاي ومعايا ضيوف جاي فجاء وفي وقت غريب اكيد في احتياج دلوقتي ففهم على طول محتاجش ان هو يتكلم جري أبو أيوب الأنصاري الى النخل بتاعه وجه قطع العزق كله يعني عارفين النخل ممكن الواد يلم الرطب منه لا هو راح قاطع الغصن كله الغصن بكل اللي فيه جابه زي ما هو كده فطبعا إنك تقطعي الغصن او انك تقطع الغصن ده كبيره قوي يعني لان الغصن ده بيطلع تاني ويطلع ثالث ويطلع رابع فلو انت شديت التمر الحبات اللي فيه كان كفايه هو قطع الغصن كله وجابه زي ما هو فالنبي عليه الصلاه والسلام يعني قال ما اردتك ان تقطع هذا يعني قطعه ليه انما كان يكفيننا التمر يعني كنت تطلع لينا شويه تمر وخلص احنا وبص يعني يا جماعه بصوا رضا النبي عليه الصلاه والسلام عن الله

بيقول ابو ايوب وهو جايله يعني يضيف عنده يقول له يعني كان كفايه شويه تمر شويه تمر كان كفايه قوي ومعايا ضيوف كمان كان بيربي بيربي اصحابه ده انت لو ادبتنا تمر يبقى كتر خيرك كتر خيرك دهده بيتكلم مع واحد اصلا ما فيش كلفه ما بينهم معلىش انت لو رحتي لح واحده صاحبك حبيبتك قوي وقدمت لك تمر هتقول لها ايه ده ايه ده ايه ده افتحي التلاجه طلعي لي طنط طلعي لنا اللحمه والفراخ تصاحب ايه دي البننت دي بخيله ليه كده طلع اعلمي لنا بقى ايوه ايوه يا طنط اعلمي لنا

سندوتشات بيض بالبسطرمة ايوه اعلمي لنا بقى بانيه ومش هيبقى يعني هيبقى عادي لان ما فيش كلفه فتخيل النبي عليه الصلاه والسلام رغم ان ما فيش كلفه بينه وبين أبو أيوب ما طلبش منه لا لحمه ولا طلب منه شعير ولا طلب من منه حاجه زياده قال له يعني كفايه توي ده أنت لو أديتنا تمر يبقى كتر خيرك ده اللي هو المفروض ما فيش كلفه مننا شوف حياء النبي عليه الصلاه والسلام وادبه وزهده ورضاه عن الله أبسط حاجه يعيش وده أشرف الخلق في ناس لما مثلاً يتقدم له حاجه مش قد المقام يزعل يا أخي أشكر كتر خيريه انقدم لنا حاجه أصلاً صح.

فقال يا رسول الله أحببت أن تأكل من تمره ورطبه وبصره يعني عايزك تاكل من كل الانواع مش عايبز انقي لك أنت نقي اللي على مزاجك انا جايب لك الغصن كله وأنت نقي اللي على مزاجك أنا س لو نقيت هنقي أنا بمزاجي أنا مش عايز انقي أنت بقى كل اللي تاكله وسيب اللي تسبيه أنا ما عنديش مشكله بعد كده قال له ايه قال ولا اذبحني لك أيضاً الله الله على جمالك يا أبو أيوب الأنصاري قال له ده أنا هذبح لك كمان قال النبي قال لك ذبح خايف بقى أن هو يكلف نفسه قال اذا ذبحت فلا تذبح ذات لبن أو عى تذبح لي حاجه بتشربوا منها لبن لا مش للدرجات دي يعني قاله خلاص ماشي ذبح ذبح تمام وجاب لمراته شعير وقال لها اعلمي خبز واعجني واخبري والجدي دوت هنقسم نصين ذبح جدي وقسموا نصين نص حطه في الطبخ ونص شواه يعني عامل بقى وليمه منوعات انت عارف كانك رحت بقى مطعم كبير بنوع لك بقي الحته دي مشويه ولا وحط خليلي دي في الطبخ ودي جوه المكرونة ودي مشوحي ودي نص تشويحه بص عمل له نوع رطب بسر تمر خبز جدي نصه مطبوخ نصه مشوي ايه ده أنا جاي على رطب شوف لما واحد يرضى عن ربنا ربنا يرضيه ومن يستعفف ها درس اهو ومن يستعفف يعفه الله النبي جاي يتعفف أنا يعني يعني لو والله لو اديتنا تمر يبقى كتر خيرك طلع اكل جدي جدي كامل قدامه نصه مشوي ونصه مطبوخ وخبز وتمر وبسر ورطب ايه كل ده ايه كل ده فالنبي عليه الصلاه والسلام قعد بعد يعني في روايه دمعت عينه دمعت عينه من فضل الله عليه دمعه عينه إحنا كنا من شويه جعنين كنا من شويه مش لاقين مش عارفين هناكل ايه في نص ساعه بقى قدامنا لحمه وخبز و سبحان الرزاق سبحان الرزاق لكن بقى النبي عليه الصلاه والسلام عمل حركه يا ربي على وجع القلب يا ربي وجع القلب هيحصلك دلوقتي النبي عليه الصلاه والسلام لما اتحط قدامه اللحمه والعيش والخبز وكده جاب قطعه خبز كبيره جاب قطعه خبز كبيره وجاب أجزاء من اللحمه وحطها جو الخبز حطها فين جوه الخبز واد لأبو أيوب الأنصاري قال أبا أيوب اذهب بهذا الطعام الى فاطمه بنتي الى فاطمه فإنها لم تذوق طعام منذ أيام يا وجع القلب يا وجع القلب فاطمه بنت محمد عليه الصلاه والسلام لما الناس تجوع بنت النبي اول واحده تجوع قال له خذ اللحمه دي والخبز ده وعدي على فاطمه قال له دي بقها كذا يوم ماكلتش أكله حلوه زي ديت وذا يدل على الإنسان المسؤول يا جماعه الأب المسؤول

الأب اللي بياكل ولاده قبل ما يأكل هو مش ياكل هو وينسى اولاده مش ياخذ حته الحلوه والولاد ياخذوا الحته التعبانه مش يقول لهم ما حدش يميد ايده على الاكل انا اخلص الاول و بعد كده انتوا تاكلوا الأب المسؤول الاب اللي عارف بنته كالت ايه وماكلتش ايه وكلت ولا ماكلتش وبقها كام يوم قصتها ايه كذا يوم متابع بدقه هي عملت ايه في الأيام اللي فاتت لدرجه ان هو عارف هي كلت ايه وماكلتش ايه وبقى لها كام يوم كلت ايه قال له خذ دي وأديها لها عشان فاطمه بقها مده ماكلتش اكله حلوه فاطمه بنت محمد فاطمه بنت محمد تمام .

سيده نساء الجنه فاطمه بنت محمد عليه الصلاه والسلام من الكوامل الأربعة من النساء يا جماعه أنتوا مش احسن من فاطمه لو عدى يوم عليكى جوزك ما لقاش ياكلك ما تزعلش لو عدى يوم عليك وابوكي ما يعني الاخر الشهر والدنيا تعبانه قضيناها فول وجبنه ما تزعلش أحسن منك كانت بتقعد بالايام ما بتشوفش اللحمه دي بالنسبه لها حلم حلم ولولا الموقف ده كانت هتقعد أيام كمان هو ربنا قدر على النبي عليه الصلاه والسلام إن يشوف أنواع البلاء ك كلها الحمد لله على كل حال.

المهم النبي عليه الصلاه والسلام بعد الموقف ده قعد دمعت عيناه عليه الصلاه والسلام دمعت عيناه تأثرا بالموقف ثم قال خبز لحم تمر رطب بسر والذي نفسي بيده والذي نفسي بيده هذا هو النعيم الذي ستسالون عنه يوم القيامة يا الله .

مجرد أن بياكل خبز شويه لحمه وتمر بيقول هذا هو النعيم الذي تسالون عنه يوم القيامة ده ده معلش أنا اسف يعني أغلبنا ده أكله العادي كل يوم أغلبنا ده اكله العادي كل يوم كل يوم ناكل يا فراخ يا لحمه يا سمك او على الاقل ثلاث أربع خمس مرات في الاسبوع ده لما يوم ولا يومين في الاسبوع مناكش لحمه بتبقى مشكله ده هو كل فين وفيين وبيقول لك ده النعيم ربنا يسالنا عليه أما ربنا يسالنا على ايه احنا بنتعوج لو اللحمه طلعت نص سوا بنتعوج لو الاكل ناقصه ملح بنتعوج لو اكلنا يومين نفس الاكله بنتعوج لو كان لحمه بايته من كتر ما بتشوفوا على الننت والميديا المطاعم ومراجعه المطاعم واللبس والاكل والشرب والبنات والقصور والهدوم بقنا مش راضيين عن حالنا اللي هو لو اتقيم بتقييم النبي عليه الصلاه والسلام نعيم أكثر من النعيم اللي شافه أكثر من النعيم اللي هو نفسه اللي كان بياكله اللي هو وصف أقل منه بنعيم هنتسأل عنه يوم القيامة وأحنا ما بنرضى وبيوت خربانه بسبب النظر والتطلعات جوزي ما بيدلني جوزي ما بياكلني ابويا ده بخيل هو عاملين اللي عليهم بس أنت اللي طموحاتك غريبه طموحاتك غريبه أنا عارف إن في ناس مش بتاكل كل يوم بس أنا بقول كثير من اللي بيحضروا معايا كده أنا بكلم اللي هو حاله كده .

فعلا النبي عليه الصلاه والسلام وضع توصيف للنعيم مش لازم القصور هو قاعد في اوضه النبي عليه الصلاه والسلام بيته بيته كله عباره عن 3 متر في 3 متر مش شقه 100 متر ولا ثبات أوض وصاله ولا نيش ومطبخ وحمام وصاله وصالون

لا لا لا بيته كله ما يجيش 4 متر في 4 متر اكله اغلبه التمر والماء وبيقول انا في نعيم وربنا يسألني على اللي انا بعمله دوت امال هيسالنا إحنا عن ايه

المهم النبي عليه الصلاه والسلام بعد كده عمل ايه بقى طلع من عند أبي أيوب الأنصاري وقال الله تجيلنا بكره قاله اجيلك بكره ليه قاله لازم تعدي عليا بكره تفتكروا هيقوله تعال عدي عليا بكره ليه لأن النبي عليه الصلاه والسلام ما يحبس حد يعمل معاه جميل ومايرجعلوش تاني دايم يرد الجمال وبسرعه بيقول ما من أحد له يد علينا ألا كافناه بها إلا أبو بكر لو يد علينا يكافئه الله تعالى بها.

قال له تجيي بكره جالسه تاني يوم قال له خير راح جاب جاريه صغيره كان عنده جاريه عليه الصلاه والسلام بنت صغيره هو ما عندوش طعام مش عارف يرجله ايه فراح ادله جاريه بدل الجدي جاريه بدل الجدي تخيلوا قال له خذ الجاريه ديت تخدمك تخدمك تشتغل معاك قال له دي كتر خيرك اللي عملته معانا امبارح استوصي بها خيرا قال له كلمه الكلمه دي لففت دماغ أبو أيوب الأنصاري قال له يا أبا أيوب استوصي بها خيرا حط تحت تحت دي 600 خط قال له استوصي بها خيرا فاني لم اري منها الا الخير ما دامت عندنا خلاص رجع أبا أيوب الأنصاري لأم أيوب لام ايوب فقالت له مين ديت قال لها هديه من النبي عليه الصلاه والسلام قالت له اديه لك ليه قال لها والله عشان ال العزومه بتاعه امبارح قالت له طب قاللك ايه قال لها قال لي استوصي بها خيرا استوصي بها خيرا فأم أيوب قالت له وكيف ننفذ وصيه النبي صلى الله عليه وسلم وكيف ننفذ وصيه النبي صلى الله عليه وسلم ف أبو أيوب قعد يفكر قال والله لا أجد لوصيه رسول الله صلى الله عليه وسلم تنفيذا خيرا من أن اعتقها لوجه الله .

تخيل بقى مراته قالت ايه قالت له هديت الى الصواب انت رجل موفق فاعتق اب الانصاري شفت الزوجه شفتي الزوجه مع ان جايها هديه جاريه جاريه و كانان ممكن تقول له احنا محتاجينها اللي أنت هتطلعها في مراه بتصد جوزها عن الطاعه ت عنه تمنعه من الصدقه خليه ما يروحش درس اقعد جنبي لا ما تنزلش ما تنزلش اقعد جنبي تمام لا ما تتصدقش لا إحنا أولى لا البيت أولى مع ان الدنيا حلوه وممكن في مساحه للصدقه قالت له بص قالها أنا مش لاقى حاجه اعملها معه لو الوصيه دي انفذها بجد اعتقها قالت له هديت الى الصواب أنت موفق هديت الى الصواب أنت موفق فاعتقها الزوجه بتصنع زوجها وب بتساعده كان ممكن تقوله كلمتين تخليه راجع في كلامه صح ..

فالانسان يعني الزوج والزوجه يا جماعه تساعدوا بعض والعكس بالعكس انت زوجتك بتحفظ قران ما تمنعها انت زوج بيتصدق قوليله كتر خيرك ربنا يوسع علينا وعليك تمام انت زوجتك عاييز تطلب علم اديها مساحه من الوقت أنتي زوجك عاييز يشتغل في الدعوه فرغي الله وقت ساعديه نساعد بعض يا جماعه الزوج الصالح والزوجه

الصالحه مش كلام حلو وهدايا وفسح دي المواقف بقى المواقف هي اللي بتبين انت فعلا جايين تساعد بعض عشان نوصل لربنا ولا كلام بنقوله في الفرح وساعد الجد لما دخلنا البيوت لا البيت المسلم ولا الاعانه على الطاعه ولا الزوجه الصالحه اللي تعني على طاعه ربنا ولا الزوج الصالح اللي بيي على طاعه ربنا وطلع كان كلام في الفرح واقع مواقف هي اللي هتبين الكلام ده كان حقيقه ولا احنا كنا بنشتغل نفسنا شكلنا اسلامي بس جوه البيت احنا مش مش مش مش جو اسلامي خالص إحنا دنيوي تماما زي اهل الدنيا لكن لو احنا فعلا على الكلام اللي اتقال في الفرح ما كانش المفروض ده يبقى حالنا.

خدوا بقى مفاجاه لابي ايوب الانصاري انتوا عارفين النبي عليه الصلاه والسلام بعد ما بنى المسجد والكلام ده عم المؤاخاه بين المهاجرين والانصار صح عمل

ايه مؤاخاه بين المهاجرين والانصار وكان دايما انتم عارفين كان بيختار بيوف اتنين شبه بعض يبقوا قريبين من بعض في المستوى أنا عايزكم كده تتخيلوا كده تخيلوا كده تخيلوا هاتوا اقصى اقصى خيالكم النبي عليه الصلاه والسلام أخى بين أبو أيوب الأنصاري ومين لأن دي لوحدها شهاده من النبي عليه الصلاه والسلام ان أبا أيوب جامد جداً جدا تفنكروا مين اللي كان حصل اخوه بينه وبين مين المهاجري اللي كان اخو أبو أيوب الأنصاري مش هتصدق أنت مش هتصدق الاسم الاسم يدولك النبي شاييف أبو أيوب الانصاري عامل ازاي وزنه عامل ازاي يلا اقول لكم المفاجاه مستعدين للصدمه امسك قلبك امسك قلبك امسك اعصابك النبي عليه الصلاه والسلام اخى بين ابو يوب الانصاري ومصعب ابن عمير خدت الصدمه خدت الصدمه اخا بين مين أبو أيوب الأنصاري وبين مصعب ابن عمير شيخ المدينه بس نقطه ومن أول السطر نقطه ومن أول السطر ان ده قدر ابو ايوب عند النبي عليه الصلاه والسلام انت مع مصعب ابن عمير تحفه تحفه مش ممكن مش ممكن أبو ايوب الأنصاري شهد مع النبي عليه الصلاه والسلام بدر واحد والمشاهد كلها وظل خادم للنبي عليه الصلاه والسلام وافي الى أن مات النبي عليه الصلاه والسلام تمام بعد كده كان انتم عارفين الصحابه كانوا بيحبوا أبو ايوب قوي قوي علشان اللي عملوا مع النبي عليه الصلاه والسلام كانوا بيحبوا يكرمك كانوا بيحبوا يكرموا لموقفهم النبي عليه الصلاه والسلام انتوا عارفين مره ابو يوب الانصاري كان في فتره في حياته عاش في العراق يعني لما كان هو طبعا كان قاتل مع جاهد مع ابو بكر الصديق وعاش في زمن عمر وقاتل وجاهد وعاش في زمن عثمان وقاتل وجاهد وعاش في زمن علي بن ابي طالب وقاتل وجاهد ولما علي بن ابي طالب انتقل للعراق راح ابو ايوب الانصاري معه العراق وقاتل معاه الخوارج اللي خرجوا على علي بن ابي طالب فهو كان مره كان هو والي على البصره يعني في زمن علي بن ابي طالب كان هو والي على البصره تمام ا اسف اسف كان كان ابن عباس والي على البصره اتلخبط معلش كان ابن عباس هو الوالي على البصره فابو أيوب الانصاري لما راح العراق

نزل البصره مين اللي ولي على البصره ابن عباس تمام ابن عباس استقبله لما عرف إن هو موجود استقبله قاله عايزك تعدي عليا قاله خير قاله لاصنعن معك كما صنعت مع النبي عليه الصلاه والسلام والله اكرمك زي ما اكرمت النبي عليه الصلاه والسلام قاله هتعمل ايه قال خذ كل ما في البيت والله لا تدع شيئاً في بيتي الا اخذته انتوا عارفين اداله ايه اداله 40 ألف درهم واداله 20 عبد مملوك واداله كل متاعي البيت متخيلين ان عباس عامل معا ايه قاله أنت تكرمت النبي سبع شهور في بيتك لازم اردھا لك لان هو قريبه ده ابن عباس يعني ابن عمي تمام ولازم ارد لك اللي عملته مع النبي عليه الصلاه والسلام قال لله شايف البيت اللي انا قاعد فيه ده هتاخذ كل حاجه فيه وانت ماشي ادله 04 ألف درهم واداله متاعي البيت كله اداله 20 مملوك كان الصحابه ببشيلوا أبو أيوب على راسهم كده شوفوا أبو أيوب يشيلوه على راسهم من الجميل اللي عمله مع النبي عليه الصلاه والسلام أهل وفاء عشان كده إحنا لازم نحبه أوي ونشكره أوي.

أبو أيوب الأنصاري كان طالب علم مجتهد كان مجتهد جداً في طلب العلم أنتوا عارفين مره رحل من أجل حديث واحد مع إن هو الحديث ده هو حافظه يعني هو في حديث كان هو حافظه بس هو لقي نفسه هو الوحيد اللي حافظه فسال هو مين تاني حافظه عشان عايز اثبتت من حفطي قالوا له اللي حافظه زيك عقبه بن عامر قال لهم عقبه بن عامر فين قالوا له في مصر مصر فقال لهم هسافر له فراح سافر من من مكانه لغايه مصر وراح لبيت عقبه بن عامر عقبه بن عامر لما عرف إن أبا أيوب الأنصاري قال ابو الانصاري جاي يزورني طلع جري واعتنقوا وقال له أنت جاي تعمل ايه وقال له أنت جاي تعمل ايه يا باشا إحنا اللي نجيل لك إحنا اللي نجيلك ونكرمك قاله لا قال له في حديث سمعته من النبي عليه الصلاه والسلام وماعرفش حد حافظه إلا أنت فأنا جاي استوثق من حفطي للحديث تمام

قاله قولھولي كده قال له كان حديث عن الستر هو مش عايز يقوله له عشان يتأكد إن هو ما هو لو هو قاله له الأول هيقوله له ثاني يبقی أنا كده ما أتأكدتش من حفطي قال له هو حديث عن ستر المسلم فجه في بال عقبه على طول قال له أبوه أنا عارفه قال له طب قوله قال له.

قال عليه الصلاه والسلام من ستر مؤمنا في الدنيا على خربه ستره الله يوم القيامة . فسمعھا زي ما هو حافظھا قال له صدقت سلام عليكم ثم انصرف أبو أيوب وعاد بكل بساطه عشان بس يثبت من حفظه لحديث واحد.

طبعا عايزين في وسط بقى كل ده ما ننساش آخر حاجتين اقولھم ما ننساش موقف رھيب رھيب لا ينسى لأبي أيوب الأنصاري وكان سبب في نزول آيه كان سبب في نزول آيه .

مين يفكر موقف خاينا في حياه النبي عليه الصلاه والسلام نرجع لحياه النبي عليه الصلاه والسلام ثاني ما يتناساه أبدا لأبي أيوب الأنصاري موقف نبل وموقف يعني حسن ظن في النبي عليه الصلاه والسلام وموقف نصره لعرض النبي عليه الصلاه والسلام .

ها أكيد افكرتو فاكرين في حادثه الإفك فاكرين في حادثه الإفك لما السيده عائشه انتقل عل اللي انتقل وبدأ الكلام يدور في المدينه وبدأ الكلام يدور في المدينه ها فطبعاً مين أقرب حد للنبي عليه الصلاه والسلام أم أيوب وأبو أيوب فأم أيوب طبعاً وصلها الكلام إن سيده عائشه عملت وبتاع والكلام اللي قاله المنافقين فأم أيوب سألت أبو أيوب هي ما اتهمتها ولا صدقت هي بتسأله بس قالت يا أبا أيوب اسمعت ما يقول الناس عن عائشه اسمعت ما يقول الناس عن عائشه قال نعم سمعت قالت فما رأيك قال يا أم أيوب بصوا بقى الكلام العالي أوي يا أم أيوب لو كنت مكان عائشه يا أم أيوب لو كنت مكان عائشه أكنت تفعلين ذلك قالت اللهم لا قال فإني أشهد الله أن عائشه أفضل منك انتهى الكلام ..

رد رهيب أوي جامد عالي فنزل فيه قول الله تعالى {لَوْلَا إِذْ سَمِعْتُمُوهُ ظَنَّ الْمُؤْمِنُونَ وَالْمُؤْمِنَاتُ بِأَنفُسِهِمْ خَيْرًا وَقَالُوا هَذَا إِفْكٌ مُّبِينٌ} [سُورَةُ النُّور: ١٢] وفعل أبو أيوب قال والله هذا كذب والله هذا كذب لا تفعله عائشه فان عائشه خير منك يا أم أيوب الله اكبر الله اكبر .

فضل عايش سيدنا أبو أيوب لغايه عدى زمان أبو بكر وعمر وعثمان وعلي قاتل مع كل دول لغايه ما وصل زمان معاويه عاش في زمان معاويه رضي الله عنه وأرضاه واجتمعت كلمه المسلمين على معاويه بعد الفتنة والفتنه خلصت وعدت واجتمعت كلمه المسلمين على معاويه رضي الله عنه وأرضاه معاويه رضي الله عنه وأرضاه في زمانه استتاب الامر وانتشرت الفتوحات بقى بدات الفتوحات تنتشر لدرج إن سيدنا معاويه قرر خد قرار رهيب في حياته رائع قوي وهو أنه قرر أن يفتح القسطنطينيه اللي هي اسطنبول دلوقتي قرر يفتح إيه القسطنطينيه طبعاً ده حاجه حلم خيال مين يقدر يفتح القسطنطينيه قرر معاويه هفتحها وعمل جيش ضخّم وجعل عليه يزيد ابن معاويه كان يزيد صغير في السن عنده 20 سنه في الوقت دوت 20 سنه بس.

أبو أيوب الانصاري في الوقت ده كان عنده 80 سنه 80 سنه أنت متخيل هو مات سنه 52 هجريه عنده 80 سنه ومات في زمن معاويه لم يستتكف إن هو يكون جندي في جيش يزيد فرق بينهم 60 سنه وراح معاه قال خلاص ما يضرني من يولى علي ما يضرني من يولى علي تواضع عجيب رغم إن هو يعني يعني يعني فين هو فين قدره وفيه قدر يزيد يعني لكن خلاص هذا هو القائد والاختلاف لا داعي منه وفعل راح معاهم رغم إن هو سنه 80 سنه بس راح معاهم 80 سنه يا جماعه وببجاهد يعني إحنا عندنا 30 سنه واحد بيقولك دا أنا في اللي مكفيني شباب عنده 30 سنه

يقولك العضمه كبرت عضمه ايه اللي كبرت بقولك 80 سنه رايح يفتح القسطنطينيه عيب عيب إحنا لسه فينا لسه أدي اقعد أبذل لغايه ما تموت متريحش مافيش عندنا سن تقاعد في الدين ده في الشغل بس فقالوا له كفايه أنت سنك كبير .

قال الله يقول انفروا خفافا وثقالا انفروا خفافا وثقالا ولقد نفرت خفيفاً فها أنا ذا أنفر ثقالا أنا عارف إن أنا تقيل دلوقتي وصعب أوي أطلع بس أنا هو ربنا قال لنا

{ انْفِرُوا خِفَافًا وَثِقَالًا وَجَاهِدُوا بِأَمْوَالِكُمْ وَأَنْفُسِكُمْ فِي سَبِيلِ اللَّهِ ذَلِكَ خَيْرٌ لَكُمْ إِنْ كُنْتُمْ تَعْلَمُونَ } [سُورَةُ التَّوْبَةِ: ٤١].

وأنا طالع يعني طالع وفعلا هو طالع عشان هو اللي محتاج الجهاد مش الجهاد اللي محتاجه هو اللي محتاج يموت على حسن خاتمه على حسن خاتمه وفعلا أبو أيوب الأنصاري في الطريق مرض أصلا ما لحقش يوصل القسطنطينيه من شدة تعبته في الطريق مرض متخيلين واشتد عليه المرض وأقعد كان بيموت خلاص بيموت حرفياً عارفين مين اللي جاله بقى مين اللي جاله لما مرض يزيد بن معاويه قائد جيش ضخم بس بس طبعا يزيد كان بيقدر الكفاءات اللي معاه وكان بيقدر برده السن لما عرف إن أبو أيوب الأنصاري تعبان راح له بنفسه وزاره إكراماً لهذا الرجل أكرم رسول الله صلى الله عليه وسلم وقال له قال له ما كيفك قال له خلاص يعني تعبانة تمام فقال ما حاجتك يعني طب نعمل ايه يريحك ايه اللي يريحك دلوقتي قال إذا أنا مت لو أنا مت في مرضي ده فخدون معكم يعني أنا ما تدفنونيش هنا خدوني معاكم لغايه ماتلتقوا بالعدو أول ما تلتقوا بالعدو وكده ادفنوني عايز أدفن في أرض المعركة عايز أتدفن في أقرب نقطه للعدو عشان ربنا يشهد إن أنا حي وميت كان نفسي أوصل للنقطه ديت كان نفسي أوصل للنقطه ديت وفعلا قال اذهبوا بي الى أرض العدو ما وجدتم مساغا فإذا لم تجد مساغا فادفنوني ثم ارجع ومات فعلاً رضي الله عنه وأرضاه وركبوا به وساروا به حتى وصلوا الى أسوار القسطنطينيه حتى وصلوا إلى أسوار القسطنطينيه وقبره تحت سور القسطنطينيه تحت أسوار القسطنطينيه هو فعلا هو ليه الآن معروف قبره في في اسطنبول عند أسوار القسطنطينيه دفنوه عند الأسوار

الروم شافوهم هم بيدفنوه فالروم سالوهم أنتم عملتوا إيه إحنا شفناكم بالليل بتعملوا حاجه بتعملوا ايه فطبعا هم خافوا أحسن يفتكروا ان ده قبر ينبش ولا حاجه راوا هددوهم قالوا لهم مات رجل من أكابر أصحاب النبي عليه الصلاه والسلام والله لأن نبش قبره لا تضربوه ناقوس في بلاد العرب ومش هتشوفوا نور أبداً في حياتكم لو حد جه جنب القبر دوت لا يضرب لكم ناقوس في بلاد العرب فخافوا وكانوا بيحترموا أوي القبر دوت حتى الروم كانوا بيحترموا القبر دوت وبنوا عليه بناء كده وبتاع عشان يعرفوه وبالتالي قدروه ما حدش جي جنبه أبداً خوفاً من مهابه أبوأيوب الأنصاري وشافوا شافوا قد ايه الناس بتقول ده ده اللي هيجي جنب القبر ده يا ويله اللي هيجي جنب قبر أبو أيوب الأنصاري وفعلا سبحان الله نزلت المهابه على قبر أبي أيوب رغم أن هو عند أسوار القسطنطينيه وهم بيفتحوا فممكن روم ينتقموا منهم

في القبر دا سبحان الله فتحت القسطنطينية وأسلم أهلها وبقي المكان دا مكان بعد كدا يعني وبقي ليه شأن قدر أبو أيوب الأنصاري إحنا لا نقر طبعا إن يحصل شريكيات وكدا أو يحصل تبرك وكدا أنا عايز أقولك يعني ليه القبر دا بقى ليه وضع بعد كدا في القسطنطينية فعاش كريما ومات في حسن خاتمه مات بيجاهد مات وهو بيقول روحوا جاهدوا بحثتي علشان ربنا يعلم إني كنت أريد إن أنا أموت في سبيل الله سبحانه وتعالى سبحان الله يعني فهذه قصة جميلة قصة عجيبة قصة المحب للنبي عليه الصلاة والسلام قصة الرجل الذي مات تحت أسوار القسطنطينية قصة المجاهد الداعية الزوج الصالح العالم وطالب العلم المتوازن الي بيعمل كل حاجة قصة جميلة يكفي إني أقولكم في الآخر أحبو هذا رجل أحبو أبو أيوب الأنصاري وزي ما قلت لكم أنت هتلاقي نفسك لوحدا أنا مش عارف ليه بحب أبو أيوب الأنصاري أوي فالحمد لله ربنا يملأ قلبنا بحبه ويا رب يجمعنا بيه في الفردوس الأعلى أرجو من الله نكون استفدنا من هذه القصة الطيبة المباركة جزاكم الله كل خير

**سبحانك اللهم ربنا وبحمدك أشهد أن لا إله إلا أنت استغفرك وأتوب إليك السلام
عليكم ورحمه الله**